



ARUBA

Afls.1,00

*Awor aki ariba
mercado!*

Richmond
Lights

Dia Nacional

Betico Croes a laga un herencia atras cu a ser menosprecia

ORANJESTAD-Mañan ta un dia di fiesta nacional, ora cu Aruba ta recordá un di su mas grandi figuranan politico, esta Betico Croes.

Un homber cu a finalizá un lucha cu otro grandinan a hiba den pasado y kendenan a haci e Arubiano, sinti su mes orguyoso di loke e ta representá y di loke e ta capaz.

Den di diez año di Status Aparte, e celebracion di mañan ta haña un toque special y por bisa hasta tristo ya cu nunca Betico Croes, a haña e oportunidad di mira su país desarroya como país soberano den Reino Hulandes.

Betico a laga un herencia grandi atras pa su país, caminda ainda por mira su marca riba desarroyonan ta tumando lugar di su país y di su pueblo.

Loke sigi ta e gran logro di e gran estadística aki, ta cu den tur movecion politico politico den e país aki, su pensamiento y su ideanan ta reflehá. Su expresion cu a bira famoso, esta piki e bandera y sigui cu e lucha, sigur ta algo cu den tur movecion politico a sosode.

TRISTO REALIDAD

Awe na vispera di celebracion di e dia na su honor, ta tristo pa señala cu e movecion politico cu mas a spera di lo continua cu e lucha sagrado di e lider fayecido aki, no a haci tal y a desvia totalmente for di e principio y idealnan cu Betico Croes semper a valora asina tanto.

Poco poco e influencia y ideanan di Betico, ta ser destruí y awe e actual lider di partido, Nel Oduber, ta empená pa destruí e influencia di Betico Croes riba e partido aki.

Henter e proceso di destruccion di e imagen y influencia di Betico den e partido, a iniciá cu e rechazo total di tur loke ta famia mas ser-

cano di e difunto lider, esta su yunan. Un di e erroman politico di mas grandi hamas cometi pa cualkier politico riba nos isla y cu a toca Nel Oduber pa haci.

Glenbert Croes siendo miembro di partido MEP, lo a duna e partido, un base politico sólido pa hopi año cu lo a bin. Sinembargo e lucha pa destruí tur influencia di Betico den e partido geel, un entrada di Glenbert den MEP tabata inaceptabel. Fuera di nenga entrada di su yiu, a bira lomba pa tur loke e famia mas sercano di Betico a nificá den su bida, un derecho cu nan tabatin ariba.

Nan a ser tratá como si fuera nan no tabata conta y awe e partido ta sinti e efectonan di e erroman aki cometi. Despues Betico su yiu muher, kende a bin haña su mes den un situacion dificil, a bira blanco di crítico di e partido cu su tata a funda, ya cu e yiu muher aki, tabata e "arma" cu a kere cu lo por tin efecto contra e yiu homber cu a bira politico, esta Glenbert.

INSTRUMENTO

Pa partido MEP nan difunto lider tabata sirbi un solo propósito, esta na momento di eleccion of cualkier situacion cu ta rekerí su fama y su grandeza.

Ta ora cu ta cumbiní algun miembro di e partido, Betico ta ricibí su reconocimiento y mañan ta un dia asina.

Ta kizas coincidencia cu net algun dia prome cu celebra e dia nacional aki na honor di e gran lider aki, cu un miembro di su partido ta reflehá e derrumber total di e partido MEP pa loke ta idealnan di Betico.

Tuma por ehempel Edison Briesen, kende siman pasá a habri afó contra **La Prensa**, mustRANDO riba un caricatura

cu e corant aki a yega di producí na vispera di Status Aparte cu lo tabata contra e derecho cu Aruba tabata bringingando pe.

E mesun Edison aki cu ta tilda **La Prensa** di tabata contra e lucha pa Status Aparte, na 1989 a bira aceptá e enemigo di mas grandi di Betico Croes, como aliado, como amigo, como colega di Gobierno. Ta trata aki di Beny Nisbet di partido PPA, e ene-

migo number uno di pueblo di Aruba, segun propio palabranan di Betico Croes.

Na 1994, casi nueve año despues di su morto, Betico Croes ainda ta haña razon riba Benny Nisbet, ora cu tuma nota kiko lider di e partido aki a haci cu e país como "miembro, amigo y colega" di Gabinete Oduber.

Awe no por papia kende tabata contra y kende tabata pro, ya cu loke partido di

Edison Briesen a haci, tabata di trece e enemigo di Betico den Gobierno, algo cu hamas e difunto lider lo a aceptá pa e simpel motibo di credibilidad. Un hende no por ta malo pa un tempo y bira bon despues pa motibo di interesnan partidista.

Ta e aspectonan aki ta haci Betico Croes un hende único, un hende demasiado grandi pa su partido na e momentonan aki.